

















兵部尚書鐵公

鐵鉉，鄧州人。洪武中國子生，授禮科給事中，調五軍  
斷事，奏對詳明。上喜，賜字鼎石。藩府坐法，刑官久  
鞫，不能奏當。上屬鉉立決。上益喜。凡兩法司疑  
獄，盡屬鉉。未幾陞山東叅政。建文二年，李景隆駐德  
州，鉉督餉。飛芻挽粟，水陸並進，軍興不乏。五月，靖難  
兵圍濟南，甚急。鉉暨徐將軍盛統兵高僉憲宋叅軍  
張都統王太守王府校等悉力防禦，令軍民詐降，開  
城門候。文皇入，急下鐵板，幾中。比出戰，令軍士噪。



馬

文皇窘大怒攻至秋七月不能克舍之南去宋

宋參軍奇策

參軍說鉉曰濟南天下之中北兵今南去其留守北  
平者類老弱且永平保定雖叛諸郡縣堅守者實多  
郭布政輩書生大參公能出奇兵陸行抵真定南朝  
諸將潰逸者稍稍收合不數日可至北平其間豪傑  
有聞義而起者大參公便宜署部號令招徠之北平  
可破也北平破北兵回顧家室必散歸徐沛間素稱  
驍勇大參公檄諸守臣倡集義勇候北兵歸合南兵  
征進者晝夜躡之大參公館穀北平休養士馬迎其



至擊之彼背腹受敵大難旦夕平耳鉉以軍餉盡  
德州城守三月士卒困甚而南將皆駑材無足恃莫  
若固守濟南牽北兵使江淮有備北兵不能越淮歸  
必道濟吾邀而擊之以逸待勞全勝計也乃設宴天  
心水面亭犒問辛苦述賦賡歌激發忠義未幾又有  
東昌之捷建文以却敵之賞賞鉉進布政使再陞兵  
部尚書叅盛庸軍務賜金幣誥命封三代鉉入謝京  
師賜宴饋粟肉小河之捷中原震動文皇欲北還  
以諸將言再戰得勝遂長驅渡江鉉感憤欲自裁



文皇登極鉉尚擁殘兵駐淮南已而擒鉉至不肯屈  
令一顧終不可得割其耳鼻竟不肯顧劈碎其體至  
死罵不絕聲時年三十七子福安戍河池康安先卒  
父仲名年八十三母薛安置海南



禮部侍中黃公

黃觀字瀾伯貴池人初從父贅姓許幼穎敏受學元黃皞皞歿節觀益砥礪嘗築翠微書舍讀書洪武二十四年會試禮部第一廷對禦戎策擢進士第一授官翰林復黃姓累陞尚寶卿禮部右侍郎建文中改侍中掌尚寶司事與方齊並見信用文皇索齊黃時觀草詔極其詆斥建文四年觀奉詔募兵上游并督諸郡勤王至安慶聞變觀痛哭謂人曰吾妻翁有志節必不辱招蒐葬之江上明日家人奔自京師言



翁夫人與二女同被執有象奴得之翁持釵釧佯使

閨門忠義千古罕有

出市酒穀遂急携二女率家屬十餘人投通濟門橋

下死觀至李陽河旣聞建文遜去卽朝服東向再拜

亦自投羅刹磯湍流之中籍其家逮及姻黨柯暹初

爲觀傳秘不肯視人後三十年縣尹清江龔守愚於

觀故址立祠祀之今金陵賽工橋側亦有翁夫人暨

二女墓祠



禮部尚書陳公

禮部尚書陳迪字景道宣城人洪武八年薦辟爲郡學訓導嘗爲郡草萬壽賀表上覽而異之十二年近臣薦召爲翰林編修十八年陞侍講預修大典二十四年陞山東左叅政二十七年内艱二十八年陞雲南右布政使時普定曲靖烏撒烏蒙諸夷煽亂迪率土兵擊破之捷聞賜金幣三十一年建文卽位改官制定六部一品免尚書鄭沂等徵迪爲禮部尚書建文二年知貢舉三年加太子太師辭兼俸靖難



兵起與黃子澄等上疏陳大計迪受命督軍儲於外  
過家未嘗入聞變卽赴京師文皇繼統召迪責問  
迪慢罵不屈與子鳳山丹山等六人同日就戮將刑  
鳳山呼曰父累我迪叱勿言罵不絕口割鳳山等鼻  
舌熬熟食迪迪唾之盆指斥遂俱凌遲死旣歿人于  
衣帶中得詩有曰三受天王顧命新山河帶礪此  
絲綸千秋公論明於日照徹區區不貳心又有五意  
詩並悲烈蒼頭侯來保者拾其遺骸歸葬縣計家橋  
洪熙初詔釋迪宗姻戍邊者還鄉給產業成化壬



黃郡人祀諸鄉賢祠甲辰郡守涂觀復于迪故居立  
祠祀之後湮廢嘉靖乙未驗封郎中李默謫判寧國  
復置祠祀郡人私謚曰靖獻默文學才行表著一時  
仕至吏部尚書兼翰林學士丙辰春爲趙文華所誣  
逮詔獄卒

李贄曰陳迪蒼頭侯來保當附







刑部尚書侯公

侯太直隸南和人靖難兵起太督餉山東濟寧不事  
輜船陷沒還京建文四年又出淮安總軍餉得便宜  
行事文皇卽位太至高郵與其隸上高茅卯仔同  
執下錦衣獄是年七月死弟敬祖子玘皆論死籍其  
家幼子京兒永樂九年尚繫錦衣獄



國名目

卷五

三



刑部尚書暴公

刑部尚書暴昭、山西人、爲北平叅政、未幾遷刑部侍郎、元北平採訪使甫至境、聞變、亟走歸聞。上建文元年、設平燕布政司於真定、陞昭刑部尚書、掌司事。平安諸兵敗、召歸京師、靖難兵入、出亡被執、見成祖、抗罵不屈、去齒、截手足、罵不絕口、至斷頸乃已。



全目

卷五

三



吏部尚書張公

附毛太

張統字昭季、陝西富平人、父月川、文行知名、統洪武中舉通經爲東宮侍書、才識通敏、太子器重統、洪武十二年冬、陞通政司左叅議、試左通政十五年、雲南平、出爲右叅政、陞辭上賦詩二章、賜統歷進左布政使、凡土地貢賦法令條格、祠祀公廨上下典儀經費程度、悉統裁定、夷民孚說、遠邇奠安、是時雲南寓賢董倫、王景韓、宜可輩、不問識不識、皆厚恤之、以故遷謫至者如歸、二十六年三月、秩滿入覲、治



行爲天下第一、特令吏部勿考、賜璽書曰、曩者討

平西南夷、命官撫守、爾統實先往任、今五年言出、則

諸夷聽服、令布、則四野歡忻、皆由誠信相孚、克共乃

職、今年來朝、不待考、而朕知其功、出乎天下十二牧

之首、故嘉汝績、復命爾仍治黔南、汝往欽哉、賜宴、及

道里費、三十一年、召爲吏部尚書、滇人如失父母、時

建文旁求遺逸、日集闕下、率命統試、鑑識精絕、各

當其材、會修太祖實錄、被<sub>知人</sub>試翰林、編纂宮考、第

高下、統得楊士奇策、喜曰、明達時務、有用之才、不但



文辭之工也。奏第一，授王府審理副靖難。後召統，  
戶部尚書王鈍諭曰：「卿二人久事皇考，習知典故，  
今皆老矣，其解職務，月給尚書半俸，居京師視時政，  
有戾舊制者，直告朕，無隱。」統出，遂自經。吏部後堂死，  
時吏部侍郎毛太亦死。太文章政事皆優，所交並中  
朝俊彥。靖難兵起，數上封事，條方略。故張統歿，太亦  
歿。統嘗爲雲南公廨，記曰：「公廨廣三十七丈，袤百丈，  
有奇。段氏時稱東府，元爲行省。皇明底綏，萬方以  
洪武壬戌戡定雲南，就置布政使司，屋宇階庭雖有



成績較之華夏則規模差陋唯堂與寢其製頗精緻旋榮累節軒翔峻起但歷歲已久柱傾直漏者屢矣周廡之外儀以重門功緒甚略意精者其舊貫而麤者元之改作也東瑛左右司以下西瑛管勾廳以下屬寺悉附焉統備員以來旋拒烏合之徒內訌而外叛兵旣未休饑疫隨之日不暇給者凡五年歲丙寅始克儲材明年冬撤其堂而新之正六楹楹圍五尺棟九架而衍其前脊高四尋簷殺脊之半以強越二

上治材且因且革門寢暨經歷司始成其外門兩



爲仍未易也。初令有司計木之數與巨細若戶力之  
益贖差而賦之轉致不立期一從其便其興徒也較  
四州十一縣夫之壯者每一州縣均作三四番每番  
期十日乍作乍輟不敢妨其務不敢竭其力遷就數  
踰年而迄未畢工如是乎其艱且滯者何哉蓋兵民  
之役有征有屯有築有餉其大者如此其小者未可  
不舉故不得已爲是迂拙之政誠不忍更促之也竊  
嘗論之雲南於古爲荒外不治之地山林幽阻民俗  
草昧各種各部如蜂蟻然無教令等威之制無官室



服用器業之資生理既不足係其心又奇險可以容  
惡是以樂縱恣而安悖亂苟求之以法而強之以不  
能改不信然相噬則缺然而長往矣昔在漢晉雖嘗  
設官亦卽其要會而領之隋唐雖置州郡皆不過  
雲霧而已固未嘗如中國間井井人也元以四夷氣  
類相近因而撫之爲宜然其弗靖者猶然也是以志  
烈之士非不欲草薶而禽獮之顧其勢有所不行亦  
禁斷久之乃已徐而思之有如耐饑渴習霧露乘高  
走險殊久而不顧者乃其所長然而性多荒惰暗事



機素無節制之可守。雖則易合亦復易離。智者察此則知所以制之矣。必有人焉才兼文武而道濟方域。曰德曰威曰廉曰信。兼此四者而事不定。人不安。吾不信也。故當無事則宜佚蕩簡易寬小過守大綱。如班定遠之言。或有蝨賊則乘其未滋。霆衝電激。指的而中之以懲其餘。斯以及心伐謀之大端。夫如是良沛急者可床下伏矣。敬告來哲。誠不知所以裁之。洪武二十三年庚午閏四月十有八日。

李贄曰洪武初年却有如此好人本







戶部尚書王公

王鈍字士泉太康人洪武十年舉秀才授主客主事  
後復舉明經授大名通判屢遷福建叅議叅政坐轉  
漕不給當罷特宥召遣持節諭撫麓川平緬却贈金  
或曰夷且疑貳柰何鈍受之悉輸雲南省藏還陞浙  
江左布政使建文初陞戶部尚書靖難兵至鈍踰城  
走後召見曰爾向輔建文間朕骨肉今何顏邪鈍頓  
首謝命致仕月給尚書半俸永樂元年六月鈍上言  
軍令屯種數事皆從之復命往北京山東撫綏軍民



經理屯戍二年四月仍浙江布政使與勅致仕卒子

噩官至戶部侍郎

或曰王鈍安得列名臣李禿翁曰卽其受贈金悉輸省藏一節便可稱大臣特名臣云爾哉受贈金所以撫夷母使疑貳輸省藏所以奉公非直爲潔大臣之道如是而已矣其得與張統嚴震直等同居六卿之長有以也然張統歿於部堂王鈍不死文皇亦卒聽受其言而時時用之則張公若不死亦未必不全身以退也然王公之得全者幸也抑



或有見於張公之旣歿遂憐而曲全之耶要之到此時而死後矣不死於靖難兵至之日則當如解縉胡廣楊士奇輩之勸進未有隱忍在列待詰問而後死者非余之樂勸人死也樂其能處死耳官至六卿之長在職又已多年豈解縉諸人居下列者比乎吾謂張公當請老於建文卽位之二年



國名目

卷五

三



工部尚書嚴公

工部尚書嚴震直烏程人洪武五年起家布衣歷陞  
工部右侍郎進尚書二十六年鄉民訴其弟姪不法  
上付震直訊報具獄上以爲不欺赦其弟姪已而  
坐事降監察御史二十八年陞右都御史復爲工部  
尚書洪武三十年二月震直上論兩廣鹽法得行江  
西安贛吉臨諸府震直質直勤敏上數稱之持時  
賜食復其家靖難兵起震直督餉齊魯間兵敗爲北  
兵所縛置布囊兩馬夾舁至北平建文遜位後復爲



工部尚書奉使安南至雲南見建文悲愴不食吞金而死



戶部侍郎卓公

戶部侍郎卓敬字惟恭瑞安人七歲時相工曰此兒  
骨髮殊異必爲名卿惜血不華色耳年十五讀書寶  
香山風雨夜歸迷失道得一兒牛馮之歸比入門乃  
黑虎也洪武二十一年進士除戶科給事中陞宗人  
府經歷進戶部侍郎建文初燕王來朝敬密奏曰  
燕王智慮絕人酷類先帝夫北平者強幹之地金元  
所由興也宜徙燕南昌以絕禍本夫萌而未動者幾  
也量時而爲者勢也勢非至勁莫能斷幾非至明莫

此議勝齊黃諸公遠矣



能察。建文覽奏大驚。翌日語敬曰。燕王骨肉至親。

卿何得及此。曰。楊廣隋文非父子。邪。建文默然。文

皇卽位。責敬不奉迎。怒欲殺敬。而憐其才。謂廣孝曰。

諸奸臣皆欲首先害朕。唯敬諫。徙封內地。若聽其言。

則干戈息矣。廣孝曰。不然。南昌地居下流。金陵加兵。

特探囊取物耳。使敬言誠用。毒、我、充、哉陛下豈有今日。於是

敬遂死。敬臨刑。從容嘆曰。變起宗親。略無經畫。敬死。

有餘罪。神色凜然。經日猶如生。夷三族。文皇常曰。

國家養士三十年。唯得一卓敬。後四十年。劉球傳其



事私謚曰忠貞敬立朝慷慨英偉美丰姿善談論凡  
天文地理律曆兵刑皆能究察詩文峭拔磊落所著  
文集五十卷



卷五

五



黃盧郭陳胡徐六公

禮部侍郎黃魁與陳廸黃觀共事魁行古雅有文學  
習典禮廸觀皆敬愛之靖難初不屈而死

戶部侍郎盧迥浙江仙居人爲人疎爽不屑曲謹然  
大節皎然少喜飲酒飲酣輒長歌人或謂其狂旣仕  
顧折節恭慎靖難後不屈縛就刑長謳而死聞者悲  
之或曰盧珙

部侍郎郭任丹徒人廉慎有吏才調兵食軍興不  
之靖難兵入金川門任不屈死子經亦坐死少子金



山保戍廣西嘉靖中鎮江知府劉儲秀祀之鄉賢祠  
兵部侍郎陳植廬江人元舉河南鄉試不仕洪武間  
起爲吏部文選司主事歷官兵部侍郎靖難兵至植  
受命督師江上有督將密議降者植責以大義督將  
恨之遂遇害督將率衆奉迎自陳邀賞文皇立誅  
之具棺斂植遣官護喪葬於白石山植宗人大懼皆  
變姓名走匿無敢會葬者

刑部侍郎胡子昭字仲常大足人初名志高富經術  
性方介從學方孝孺游漢中蜀獻王重子昭贈子昭



詩以明經儒士薦爲榮縣訓導建文初陞翰林檢討  
又陞山東按察僉事進刑部左侍郎建文四年九月  
死臨刑詩曰兩間正氣歸泉壤一點丹心在帝鄉時  
年四十一父復初母郭氏皆年八十餘并其子五人  
紹續繼等皆謫戍正德中巡按御史熊相立祠祀之  
兵部侍郎徐庠字宗實黃巖人以字行聘授風紀官  
庠以草茅愚孱辭授銅陵簿謫淮陰驛丞郡邑士多  
所造就召見獎諭屢聘主文衡陞蘇州通判擢兵部  
右侍郎靖難兵起奉使招集兩浙義勇明年建文遜



位去。屋家覆没于京師。屋義槃侃然杜門終老。

善處。

通鑑綱目卷五終



續藏書卷六目錄

遜國名臣

景清

茅大芳

陳性善

胡閏

劉端

王高

鄒瑾



彭與明

盧原質

薛崑

廖昇

周是修

王叔英

附 盛希年

王艮

董倫



王景

唐愚士

高遜志

張顯宗

附 楊璉 房安 呂昇

樓璉

王達

高魏

宋徵



劉伯完

黃鉞

附 楊福

龔太

韓永

陳繼之

戴德彛

韓郁

曾鳳韶



王彬

董鏞

葉希賢

魏冕

甘霖

王度

鄭公智

尹昌隆

巨敬



王良

程本立

附 沈壽康

胡子義

林嘉猷

鄭居貞



續藏書卷六

遜國名臣

御史大夫景公

景清陝西真寧人，洪武二十七年進士第二人。初領鄉薦，遊國學，同舍生有秘書，清請之，不肯與。清固請，請以明旦卽還，而書生旦往索書。清曰：「吾不知何書，吾不假書于汝。」生忿怒，訟之。祭酒清卽持書往見祭酒，曰：「此清所誦書，卽誦書徹卷。」問生：「生不能誦一詞。」祭酒叱生生退。清卽以書還生，曰：「吾以子珍秘太甚。」



故相戲耳。清初赴舉時，過宿淳化主家。主家有女，爲妖所憑。是夜清在，而妖不來。女詰之曰：「吾避景秀才清也。」女以告父。父追及清，語之。清書景清在此四字，令歸粘其門。妖遂絕。清試禮部第三，錄詩書二經入翰林。三載，改監察御史。三十年春，召見，嘉其才，命署都察院左僉都御史，與實俸出川陝巡察私茶。建文卽位，擢左都御史，改御史大夫。文皇繼統，方孝孺、練子寧等都死，而清獨委蛇侍朝。人以其素頗疑之。一日早朝，清緋衣入。先是星者奏文曲犯帝座，甚



急文皇已疑清及朝清獨著緋遂收清得所帶劍  
不屈而歿是夕精靈迭見族其家已而時入殿庭爲  
厲又命籍其鄉轉相攀染謂之瓜蔓抄村里爲墟







都御史茅公

都御史茅大芳，太興人，博學能詩文，少有奇名。或贈之詩曰：陸機此日能爲賦，賈誼何時復著書。洪武中，儒士應辟，典教淮南，考績入朝。高廟召對，院之擢秦府長史，勉以董子輔相之業，賜賚甚厚。大芳感激，額其堂曰：希董方孝孺爲記。稱大芳志意偉然，敦大和雅，不亢不諂。建文卽位，擢右副都御史，靖難兵起，遺詩淮南守將梅殷曰：幽燕消息近如何？聞道將軍志不磨。縱有火龍翻地軸，莫教鐵騎過天河。關中



通鑑綱目卷之六十三  
事業蕭丞相塞上功勲馬伏波老我不才無補報西  
風一度一悲歌建文四年八月死子順童道壽文生  
並論死二孫添孫歸生死獄中有希董集五卷行于  
世



都御史陳公

陳性善名復初以字行山陰人洪武十八年進士  
上見性善疑重謂侍臣曰性善君子人授行人司副  
入翰林爲檢討初誠意伯劉基卒命李鐸往取其  
遺書基子璉卽出觀象玩占石室中書從鐸詣闕  
上之性善善楷書召入便殿繙錄上威嚴進見者  
惶汗手顫不成字唯性善動止安雅書法端正上  
悅賜性善酒是時威譴叵測性善留竟日家人以爲  
死矣比出大驚喜久之超陞禮部左侍郎荐薛正言

薦

夫



輩雲南布政使韓宜可隸謫籍性善荐起爲副都御史  
皇太孫在東宮時熟聞性善名及卽位獨召性  
善賜坐問治天下之要性善所言悉從然施行未竟  
輒爲有司所更性善請見曰陛下不以臣愚猥承願  
問臣旣僭塵上聽許臣必行未幾輒改所謂爲法自  
戾何以信天下靖難兵起改性善爲副都御史監軍  
建文四年三月辛巳戰靈璧敗績與彭與明劉伯完  
王資皆被執文皇縱之歸性善衣朝服躍入河歿  
後加追戮家徙邊已而赦還



大理少卿胡公

胡閏字松友、鄱陽人、博學修行。高皇征陳友諒、至鄱陽、吳芮祠、見壁間題、竹、幽人無俗懷、寫此蒼龍骨、九天風雨來、飛騰作靈物。高皇問祠中人、此誰詩、對曰、里中儒生胡閏、立召閏、見置帳前、久之、官督府經歷、建文中、以直諫知名、遷右補闕、尋進大理少卿、靖難兵起、數與齊黃議軍國事、壬午七月、不屈、歿、籍其家、子傳道、論歿、傳慶、謫戍邊、一女得釋歸、貧甚、無倚、鄉人競遺錢穀、曰、此忠臣女也、旬日、饒足、嘉靖初、



提學副使邵銳祠之學宮



大理丞劉公王公

大理寺丞劉端南昌人建文二年進士驟遷大理寺丞靖難後與同邑王高並坐縱方孝孺息樹陰劓鼻而終高與端同年進士又與端同官

右二賢皆是並坐縱方孝孺息樹陰劓鼻而終者又是一樣死也







大理寺丞鄒公

鄒瑾吉安永豐人、洪武二十七年、遇金華王紳、紳稱瑾志篤才敏、議論磊落、可嘉、忠義人也、洪武末薦至京、建文二年爲大理右寺丞、靖難後不屈、歿、







大理寺丞彭公

彭與明萬安人貢入太學、洪武二十五年授兵科給事中、陞刑部浙江司員外郎、建文元年陞湖廣按察僉事、尋陞大理右寺丞、與明廉勤律已、剛毅敢言、敏達能斷、四年、擇中朝官知兵有風裁者、出江北督察諸將、與明爲衆所推、遂出淮西至靈壁、會何福戰敗、爲北兵所執、文皇遣歸、令傳語中朝士、與明慚憤、裂冠裳、棄官、變姓名而隱、不知所終、



通國名目

卷之



太常少卿盧公

盧原質字希魯浙江寧海人洪武二十一年進士第  
三人授翰林編修孝孺遺原質詩曰奉天殿上榜初  
開共賀江南得異才好與青蘿居士說今年文運屬  
大台二十三年丁外艱賜傳奔喪二十八年陞太  
常少卿事建文累有建白靖難後召見不屈歿族其  
家



通國名目

卷六

九



大理少卿薛公

薛崑閔鄉人有口辯建文三年以鎮江知府爲大理  
左少卿是年方孝孺建議草詔令崑賁至北平又作  
宣諭數千言刊印千紙付崑令密散北兵諸將士崑  
見成祖曰上言殿下旦釋甲謁孝陵暮卽旋  
師成祖叱曰事至此尚誰欺左右請殺崑成祖  
曰天子命使也釋之歸靖難後免崑死謫廣西



通國名目

卷六



太常少卿廖公

廖昇湖廣襄陽人不知其所以進學行最知名與方  
孝孺王紳輩友善洪武中爲在府斷事上知其賢  
二十九年六月擢太常少卿建文元年正月勅修  
高廟實錄昇博雅有史才朗達負氣書靖難兵事語  
多據實聞忠誠伯等自龍潭還慟哭與家人訣自縊  
死都御史陳瑛奏昇與黃觀王叔英周是修王良顏  
伯瑋皆不順天命效死建文計其存心與叛逆等並  
宜追戮上詔勿問







衡府紀善周公

周是修名德以字行江西泰和人少孤力學舉明經  
爲霍丘學訓導入見太祖問家居何爲對曰教人  
子弟孝弟力田太祖喜擢周府奉祀正逾年從王  
北征至黑山還陞紀善建文元年王有過盡逮府吏  
詔獄是修以嘗諫勸得免改衡府紀善衡府者建  
文之弟當是時衡王猶未之國是修留京預修纂翰  
林好荐達知名士陳說國家大計及指斥用事者誤  
國用事者怒共挫折之是修屹不爲動靖難師渡江



宮中自焚是修留書其家別友人江仲隆解縉胡靖

蕭用道楊士奇付以後事暮入應天府學府學今有祠祀公自經死死

年四十九文皇繼統都御史陳瑛言是修不順天

命請加追戮上曰彼食其祿自盡其心勿問是修

常曰忠臣不以得失爲憂故其言無不直烈女不以

死生爲慮故其行無不果因取先代及近世忠節遺

事輯爲觀感錄朝夕省覽

李禿翁曰周先生猶勝王先生良多



翰林修撰王公

翰林修撰王叔英字原采台州黃巖人洪武二十年  
薦起爲仙居訓導三十年改海安府學陞漢陽知縣  
有惠政嘗遇旱虔禱不效遂絕食天大雨復祈晴遂  
霽建文初方孝孺欲復古井田叔英貽書力阻之曰  
凡人有才固難能用其才者尤難子房之於漢高能  
用其才者也賈誼之於漢文不能用其才者也方今  
明良相值千載一時但天下之事固有行于古而亦  
可行于今者如夏時周冤之類是也亦有行于古而



難行于今者如井田封建之類是也可行者行則人之從之也易難行而行則人之從之也難從之易則民樂其利從之難則民受其患此君子之用世貴得時措之宜也召爲翰林修撰靖難兵至淮上建文遣使四出募兵叔英奉詔行至廣德聞上已遜位卽慟哭會齊泰奔叔英曰泰貳心矣急擒泰至密問之乃相抱哭相語共圖再舉已而知不可爲乃沐浴衣冠書絕命詞藏衣裾間自經于玄妙觀銀杏樹下詞末有千秋史官筆慎勿稱希賢之句又題其案曰



生既久矣。未有補于當時。歿亦徒然。庶無慚于後世。  
妻金安人。繫獄歿。二女赴井歿。祠山道士盛希年收。  
道士亦可人葬叔英于本州城西五里之地。正統中楊士奇題曰。  
嗚呼翰林修撰王原公墓。士奇叔英所薦起也。成化  
中州守莆田周瑛封植表識之。嘉靖中鄒守益謫爲  
州判官。立祠奉祀。太平知縣曾才漢又建忠節祠祀  
叔英妻并二女。又有貞烈祠在黃淡畧上。







翰林修撰王公

王艮字敬止吉水人建文元年江西發<sub>舉</sub>第一明年  
舉禮部廷試策最優以貌不揚易胡靖第一艮第二  
李貫第三並授翰林修撰如洪武十八年故事艮初  
聞靖難兵起輒憂不食日羸憊及渡淮閉門涕泣不  
已訣妻子服毒歿建文哀其忠遣禮部侍中黃觀  
諭祭永樂初上出建文時羣臣封事千餘通令解  
縉等編閱留軍馬錢糧數盡焚諸言語干犯者因從  
容問貫縉等曰爾等宜皆有之衆未對貫獨頓首曰



臣貫實未嘗有也。上曰爾以是爲美邪？食其祿，思任其事，當國家有事時，官近侍，獨無一言可乎？朕非惡夫盡心于建文者，惡導誘建文壞法亂政耳。爾等前日事彼，則忠于彼；今日事朕，當忠于朕，不必曲自遮蔽也。後貫遷中允，坐累繫獄十年，竟歿獄中。貫亦吉水人。



侍郎學士董公

董倫字安常、恩縣人、僑居宛平、質直、有文學、從游者稱爲貝川先生。國初擢用單縣儒士張寧、寧薦倫。洪武十五年、遣使徵爲右贊善事。懿文太子十八年、擢左春坊大學士。太子卒、出爲河南左叅政。上封事數千言、又薦肇州吏目諸葛伯衡。上擢伯衡陝西右叅議。三十年、註誤免官。典教滇南。建文在東宮、憐其老、且遠去、賜白金若干鎰。及卽位、召拜禮部侍郎、兼翰林學士。賜御書怡老堂扁、及髹几、玉鳩。



杖各一。倫上表謝。畧曰。桓榮設几杖於太常。不聞宸  
翰之賜。晏殊題舊學于神道。未見几杖之頒。自今將  
杖以戒。噎則當思四海。或有饑餒之民。憑几以安身。  
則當念一物。或有顛連之嘆。或曰。此孝孺代筆也。時  
解縉謫河州衛吏。與倫書。祈援倫左右。縉得召還。爲  
待詔。倫爲人質直敦厚。建文間。屢懇言宜親睦宗人。  
不聽。靖難後。倫年八十餘。令致仕。出京。悒悒成疾。數  
日卒。

黃倫王景皆從雲南謫籍而起。至于六卿長貳。爲



朝廷侍從左右親密近臣者也。建文真若主矣。王景不歿，董倫至，勒令致仕，乃悒悒歿。是均之不欲歿也。天歿，豈人所欲哉？然居此地，到此時，安有不歿之理也。建文二年廷試一榜，胡廣第一，親改名，靖其二王，良以猜嫌。似于建文未爲知己，反烈烈而歿如此，可敬也。六若第三名李貫，曷足道哉。今董倫、王景等，吾若擠之，使與李貫等並，則有人品，有文學，實亦非其等夷。或曰：此列建文時諸名臣書也，何必以歿爲重乎？若專重歿節，則直曰遜。



國忠臣可矣。何以曰遜國名臣也。卓吾子曰。予因惡夫爲李貫者。幾錯會了鄭端簡公。場主意。



侍郎學士王公

王景字景彰松陽人洪武初起家懷遠教諭歷知州  
山西叅政謫雲南建文召景爲知縣留與修高廟  
實錄母憂去服闋吏部尚書張統爲雲南布政使時  
知景薦陞禮部右侍郎兼翰林侍講充總裁官靖難  
後進學士時言建文崩上問景葬禮景頓首言宜  
用天子禮上從之景博學能文章善書







翰林侍講唐公

唐愚士名之淳以字行山陰人建文二年勅翰林侍從之臣方孝孺等集數千載經史中事爲一書又命舉優通文學之士孝孺首薦愚士愚士時寓金陵爲李景隆子師立召爲翰林侍讀賜冠帶令與孝孺俱領修書事進講前漢書愚士父肅仕國初應奉翰林文字以故愚士得遍游公卿間宋濂稱其文迨肅謫死臨濠愚士奉喪歸葬求父遺文雖荒郵敗壁高崖斷石靡不纂錄什襲時時伏讀聲甚淒切聞者



通國名目  
皆掩涕愚士長身巨鼻博聞多識爲文蔚贍尤長于  
詩翰洪武中數從景隆徧游燕薊秦周所過廢都舊  
邑名賢古帝遺跡輒爲詩歌論記性喜飲酒酒酣高  
談傾坐晚得官近侍未幾病病愈復起明年病甚比  
卒遺言請銘孝孺愚士貧無他宗族喪事數千百緡  
倚辦景隆孝孺爲聞上詔有司給舟歸葬







